

# A Festa da Filloa de Lestedo obtén o título de Festa de Interese Turístico Nacional

Só hai tres celebracións con esta distinción na provincia da Coruña e doce en toda Galicia

A Festa da Filloa de Lestedo vén de obter o título de Festa de Interese Turístico Nacional. A Secretaría de Estado de Turismo remitiulle ao Concello de Boqueixón (quen cursou a solicitude impulsada pola Asociación Cultural da Filloa de Lestedo) a resolución favorable á concesión do título de Festa de Interese Turístico Nacional (FITN).

Tanto a Asociación Cultural da Filloa de Lestedo como o Concello amosaron a súa satisfacción por obter este título. “Esta é a xusta recompensa e recoñecemento ao esforzo realizado por parte da veciñanza de Lestedo durante máis de catro décadas”, asegura o presidente da agrupación, Xosé Manuel Canabal, quen engade que “agardamos que esta declaración sirva para ampliar as actividades promocionais e divulgativas en torno á Filloa de Lestedo, levándoa a distintos puntos da xeografía española”.

Pola súa banda, o alcalde, Ovidio Rodeiro, afirmou que “esta distinción ábre-nos as portas á proxección da Festa da Filloa de Lestedo alén as nosas fronteiras,



O delegado e a subdelegada do Goberno celebraron a distinción xunto ao alcalde de Boqueixón e o presidente da Asociación Cultural da Filloa de Lestedo

poñendo en valor a nosa tradición, cultura e o bo facer da nosa veciñanza”. Neste senso, indicou que desde o Concello traballarán arreo “para promover as Filloas de Lestedo e para engrandecer esta exaltación gastronómica que xa leva o nome de Boqueixón por todo o país”.

## Requisitos

Para a declaración como Festa de Interese Turístico Nacional, a Festa da Filloa de Lestedo acreditou, a través dunha completa memoria técnica, cumprir con todos os requisitos esixibles por parte da Secretaria

de Estado de Turismo para acadar este recoñecemento. Entre eles figura o apoio unánime por parte da Corporación municipal e un informe favorable emitido por parte da Axencia de Turismo de Galicia en apoio á súa candidatura. Neste senso, desde o Concello e a Asociación Cultural da Filloa de Lestedo agradeceron “a colaboración e implicación” do organismo autonómico en aportar o pulo necesario para acadar a resolución favorable recibida hoxe.

Ademais, na memoria técnica da Asociación Cultural da Filloa, realizada en

colaboración co Concello, acreditáronse tanto a orixe da celebración -que comezou a súa andaina no 1984-, o arraigo cultural, a implicación veciñal que demostra o seu desenvolvemento, así como datos sobre a colaboración establecida con diferentes entidades tanto locais como supramunicipais e doutra índole. Unhas sinerxías que contribuíron a engrandecer a celebración e a ampliar a súa programación.

Do mesmo xeito, incluíronse os preto de medio cento de impactos que a Festa tivo en diversos medios de comunicación, xeralistas e especializados a nivel nacional, o que corrobora o interese pola celebración. Igualmente, incluíronse, entre outros aspectos, datos sobre as visitas rexistradas nos últimos anos e como esta celebración contribúe tamén á dinamización económica non só de Lestedo, senón tamén do conxunto de Boqueixón e da súa contorna. Tamén se deu conta da renovación da web (adaptada aos criterios de accesibilidade AA), ademais da presenza da Festa nas Redes Sociais.

### Obriga de rozar e limpar os terreos para previr lumes

O Concello de Boqueixón lembra que as persoas propietarias de terreos e solares, independentemente do tipo de chan, teñen a obriga do seu mantemento e limpeza durante todo o ano e, especialmente, antes do 30 de maio, data na que aumenta o perigo de lumes.

A biomasa vexetal debe xestionarse nunha franxa de 50 metros ao redor do chan urbano, de núcleo rural e urbanizable (isto tamén inclúe limpar a maleza das parcelas urbanas), arredor das edificacións destinadas a persoas, vivendas illadas, urbanizacións e parques industriais situados a menos de 400 metros do monte e arredor das edificacións illadas en solo rústico a máis de 400 metros do monte.

Ademais, é preciso retirar piñeiros, eucaliptos, mimosas e acacias situadas e menos de 50 metros dos solos e edificacións indicados no parágrafo anterior.

De incumprirse as obrigas, o Concello notificarallas ás persoas responsables e tamén podería instruír un procedemento sancionador.

## Rodeiro lémbrale ao Goberno a urxencia de mellorar a seguridade viaria en Lestedo

### O alcalde solicitou a inclusión nos Orzamentos do Estado do proxecto de construción dunha rotonda na N-525

O alcalde de Boqueixón, Ovidio Rodeiro Tato, aproveitou a visita do delegado do Goberno en Galicia, Pedro Blanco, e da subdelegada na provincia da Coruña, María Rivas, ao municipio para lembrarlle a urxencia de mellorar a seguridade viaria da N-525 ao seu paso por Lestedo. “Urxe mellorar a conexión da N-525 coa estrada provincial de Vedra (C-1202) e a estrada municipal que discorre cara o campo de fútbol e o Pico Sacro mediante unha rotonda que mellore a seguridade viaria nesta zona de Lestedo”, explicoulle sobre o terreo Rodeiro a Blanco.

O alcalde, acompañado por gran parte do Grupo de Goberno, amosou os problemas da nova sinalización horizontal levada a cabo polo Ministerio de Fomento na intersección da N-525 coa C-1202 e a estrada municipal cara o Pico Sacro, prohibindo tanto o xiro á esquerda en dirección Santiago-Ourense como atravesar a N-525 desde a C-1202 cara o Pico Sacro e viceversa. Unha sinalización que prexudicou especialmente aos veciños das aldeas de Milleirós e



Ovidio Rodeiro explicoulle ao delegado do Goberno que a rotonda facilitará o acceso a Milleirós e Vilar e mellorará o tráfico de Lestedo con Vedra e Pazos

Vilar, que ven dificultado o acceso ás súas vivendas, e que supuxo incomodidades tanto para os milleiros de visitantes do Pico Sacro como para os condutores que cada día circulan entre Lestedo e Vedra ou Pazos.

Para solucionar o problema, o Concello solicitou en novembro de 2021 a construción dunha glorieta na N-525, da que xa está redactado un proxecto orzamentado en 250.000 euros e que permitiría reducir a velocidade dos vehículos que entran en Lestedo, polo que xa non sería preciso instalar o semáforo solicitado polo Concello. “Sabemos que o Ministerio

de Fomento ten redactado xa o proxecto de rotonda, pero que está pendente de financiamento a través da súa inclusión nos Orzamentos Xerais do Estado”, apunta Ovidio Rodeiro.

Estas actuacións únense á demanda veciñal para que se mellore o tráfico e a circulación de vehículos en Lestedo, a través da redución da velocidade no inicio da avenida, o que repercutiría directamente na seguridade dos veciños e veciñas. Unha situación da que tamén se deu traslado ao anterior delegado do Goberno, José Miñones, durante a visita realizada en outubro de 2022.

### CALENDARIO DO PUNTO LIMPO MÓBIL

De	Ata	Parroquia	Lugar
29 abr	5 mai	Loureda	Campo da festa
06 mai	12 mai	Gastrar	Campo da festa
13 mai	19 mai	Boqueixón	Campo da festa
20 mai	26 mai	Codeso-Donas	Campo da festa
27 mai	09 xuñ	Oural-Pousada-Sucira	Casa da Cultura

## O Concello traballa na ampliación da rede de saneamento en Quián

O Concello de Boqueixón vén de comezar a traballar na primeira ampliación da rede de saneamento desta lexislatura. Neste caso correspóndese coa aldea de Quián, na parroquia de Sergude, onde as máquinas traballan xa na instalación das novas tubaxes que permitirán achegar este servizo municipal a aquelas vivendas da aldea que carecen del.

Así mesmo, os Orzamentos Municipais do Concello de Boqueixón para este ano 2024 reservan outros 370.000 euros máis para dotar de saneamento aos núcleos de Frenza (Sucira), Agra (Loureda), Ardilleiro Pequeno (A Granxa), Xiadás (Gastrar), O Casal e Zaramacedo (Lamas) e Vilalpez (Oural).



Axudas de 400 € para fomentar a natalidade

O Concello lembra que está aberto o prazo de solicitude das axudas de 400 euros para o fomento da natalidade, que poderán solicitarse por cada crianza nada, adoptada ou acollida en Boqueixón antes do 31 de decembro de 2024.

As subvencións outórganse independentemente da renda familiar e deberá ser utilizada para comprar produtos infantís, como alimentos e produtos de hixiene, en tendas en Boqueixón. As solicitudes deberán presentarse no Rexistro Xeral do Concello antes de 15 días naturais a contar dende o día seguinte ao nacemento, acollida ou adopción.



### Dous puntos de recollida de roupa para Cáritas en Sergude e Lestedo

O Concello de Boqueixón e Cáritas Diocesana de Santiago veñen de asinar un convenio de colaboración que permitiu a instalación de dous puntos de recollida de roupa, calzados e complementos nas localidades de Sergude e de Lestedo. Uns contedores que foron instalados na xornada de onte en Sergude, a carón da Taberna de San Benito, e en Lestedo, na contorna do Eroski. As doazóns deberán depositarse no contedor en bolsas pechadas.



### O Concello condena a vandalización dos bancos violeta

O Concello condena e amosa o seu total rexeitamento aos actos de vandalización sufridos polos dous bancos violeta instalados o ano pasado en Lestedo, como peche da programación de actividades en conmemoración do 25 de Novembro, Día Internacional da Eliminación da Violencia contra as Mulleres. Uns actos incívicos que son unha mostra de falta de sensibilidade a unha loita necesaria na que todas as persoas debemos amosar unión.

## Volve o programa de conciliación Verán Activo

O Concello de Boqueixón organiza unha nova edición do *Verán Activo*, un programa lúdico-educativo que permitirá ás familias conciliar a súa vida persoal e laboral, ao tempo que oferta unha alternativa de lecer para crianzas de entre 3 e 12 anos nas vacacións de verán.

As actividades terán lugar de luns a venres, en horario de mañá, nas instalacións municipais do Forte e do CPI Antonio Orza Couto. O prazo de inscrición abrirase en xuño e as solicitudes poderán descargarse na web municipal ([www.boqueixon.gal](http://www.boqueixon.gal)).

**XXXI ENCONTRO DE MAIORES**



**4 DE MAIO - POLIDEPORTIVO DO FORTE**

**PROGRAMA DE ACTOS:**

**12:30** MISA (SALÓN DE ACTOS DO COLEXIO)

**13:30** XANTAR

**15:30** MÚSICA E ANIMACIÓN...

**18:30** REMATE DO ENCONTRO

TRaslado en autobús das persoas participantes que o soliciten (CONSULTAR HORARIOS)

**RECOLLIDA DE ENTRADAS NO CONCELLO ATA O 30 DE ABRIL**

**CUSTO:**

- 60 ANOS OU MÁIS E PENSIONISTAS : 10€
- MENORES DE 60 ANOS: 25€



CONCELLO DE BOQUEIXÓN

## O polideportivo do Forte acolle o XXXI Encontro de Maiores

O Concello de Boqueixón organiza a edición número 31 do Encontro de Maiores, que terá lugar o sábado 4 de maio no polideportivo do Forte. O Concello de Boqueixón ofrecerá servizo de traslado en autobús a aquelas persoas que o soliciten.

A festa, dirixida a persoas maiores de 60 anos e pensionistas, comezará cunha tradicional misa ás 12:30 horas no salón de actos do CPI Antonio Orza Couto. O xantar será ás 13:30 horas e estará acompañado de música e animación.

O Concello homenaxeará ás dúas persoas de maior idade presentes na festa e sorteará agasallos entre todas as persoas asistentes en colaboración con SBC Gasolineiras.



## Nova renumeración das vivendas para evitar confusións

O Concello de Boqueixón segue adiante co seu proceso de numeración dixital de todo o municipio. Nesta ocasión, o alcalde, Ovidio Rodeiro, mantivo unha reunión coa veciñanza de Camporrapado, A Silveira e Rebordaos para informalos sobre a necesidade desta nova renumeración das vivendas para evitar as confusións que provoca a actual. Coa nova numeración, todas as vivendas quedarán xeoreferenciadas, o que facilitará a súa localización.



## Boqueixón participou cun stand na XLII Festa do Viño da Ulla

O Concello de Boqueixón tomou parte na XLII Festa do Viño da Ulla. Ademais da participación do alcalde, Ovidio Rodeiro, no pregón celebrado no campo da festa de San Miguel de Sarandón, o Concello estivo presente nun stand no que se promoveron todos os atractivos turísticos e gastronómicos do municipio. Un stand no que se fixo fincapé en dúas celebracións: a Festa da Filloa, que vén de ser declarada de Interese Turístico Nacional, e as Carrozas de San Cidre.

# As Carrozas do San Cidre celebran as súas vodas de ouro o 19 de maio

A parroquia de Oural ultima os preparativos para celebrar a edición número 50 do desfile das Carrozas do San Cidre, unha actividade na que traballan ou colaboran dende principios de ano a gran maioría dos catrocentos veciños e veciñas da parroquia. Unha veciñanza que agarda que a súa festa sexa recoñecida en breve como Festa de Interese Turístico Galego pois conta con todos os requisitos precisos: é a primeira festa de exaltación dos labores do campo da que se ten constancia na comarca, con máis de medio século de traballo ás súas costas e coa implicación de todas as aldeas da parroquia.

Así, a partir das 11:00 do 19 de maio, oito carrozas participarán na mostra e posterior desfile polas rúas de Cam-

porrapado, coa música da Charanga BB+, Son de Gaita e Cantigas e Agarimos. Ás 14:00 horas, pregón co xornalista Fran Cañotas, presentado por Javier do Nervioso, que dará paso a unha degustación de petiscos e viño en cada carroza baixo a música da Charanga BB+ e Tania Veiras. Ás 18:00 horas, verbena coa Orquestra Olympus.

Mais as Festas do Oural darán comezo o venres 17, con misa na honra da Nosa Señora da Fátima ás 22:00 horas con procesión acompañada por Son de Gaita. Ángel América e Punto Zero encargaranse da verbena. E o sábado 18, misa ás 13:00 horas na honra á Nosa Señora do Rosario e ás 23:00 horas verbena coa orquestra Compostela e discomóvil Chocolate.

## 50ª EDICIÓN DAS CARROZAS DO SAN CIDRE Oural - Camporrapado (Boqueixón) 19 MAIO 2024



11:00h. - MOSTRA DE CARROZAS, CHARANGA BB+ E SON DE GAITA  
12:00h. - SAIDA DO DESFILE DE CARROZAS  
13:00h. - CANTIGAS E AGARIMOS  
14:00h. - ACTO DE PRESENTACIÓN DA FESTA A CARGO DE JAVIER DO NERVIOSO  
PREGÓN A CARGO DE FRAN CAÑOTAS XORNALISTA, PRESENTADOR E ACTOR  
DEGUSTACIÓN DE PETISCOS E VIÑO DA ZONA EN CADA CARROZA  
CHARANGA BB+ E TANIA VEIRAS  
18:00h. ORQUESTRA OLYMPUS



## Talleres de condutas responsables para o alumnado do colexio

O alumnado de 1º e 2º da ESO e de 6º de Primaria do CPI Antonio Orza Couto participaron en tres obradoiros do Programa de prevención de condutas aditivas, que o Concello organiza en colaboración coa Consellería de Sanidade. O alcalde, Ovidio Rodeiro, participou na sesión inaugural duns talleres que buscaban fomentar a autoestima da rapazada, fomentar a súa intelixencia emocional e promover a empatía para evitar os conflitos.



## Os maiores disfrutan dun circuío termal de dúas horas nun balneario

Vinte veciños de Boqueixón, maiores de 60 anos, participaron na segunda das tres saídas ao Hotel Balneario Compostela organizadas polo Concello. Nelas participan nun circuío termal de dúas horas "onde gozan dos beneficios físicos e psíquicos da hidroterapia", explica a concelleira de Servizos Sociais, Ángela Conde. A próxima saída será o 13 de maio e as persoas interesadas en participar poden anotarse nos Servizos Sociais (981 513 106).

## Abertas as inscricións na viaxe a Ribadavia

O Concello de Boqueixón abre inscricións na excursión a Ribadavia e comarca do Ribeiro, que terá lugar o sábado 11 de maio. Unha viaxe que abrirá o programa "Boqueixón en ruta 2024", que inclúe as seguintes saídas: Canóns do Sil, Ribeira Sacra e Castro Caldelas (1/6), Rías Baixas (3/7), Costa da Morte e Fisterra (21/09) e Termas de Outariz (6/11).

O prezo da viaxe a Ribadavia será de 25 euros e inclúe visitas guiadas ao casco histórico, castelo, museo etnográfico e museo do viño. Inscricións presencialmente no Concello ou no 981 513 115.



## O equipo de Boqueixón de fútbol gaélico, subcampión de Europa infantil e cadete

O equipo de fútbol gaélico de Boqueixón vén de acadar un fito histórico ao proclamarse subcampión de Europa nas categorías infantil e cadete. A rapaza adestrada por David de la Torre abriuse paso ata a final nun torneo con equipos de renome de Alemaña, Bélxica, Francia, Suiza e España.

"Ningún equipo galego chegara á final. É un logro tremendo para o fútbol gaélico galego e para nós como equipo", apuntou David de la Torre. De feito, O Forte de Boqueixón mantivo o tipo en todo momento, empatando a 7 no descanso da final, e só cedendo ante o físico dos seus rivais do Bruxelas.

## O Concello convoca un roteiro arqueolóxico polo Pico Sacro

Coincidindo coa celebración da Romaría do Pico Sacro na honra a San Sebastián, o domingo 26 de maio o Concello de Boqueixón organiza un roteiro arqueolóxico gratuito polo Pico Sacro e a súa contorna. A ruta sairá ás 12:30 horas do aparcadoiro do Pico. Para participar é preciso anotarse no 981 513 061 ou en boqueixon-turismo@gmail.com.

Paralelamente, a Comisión de Festas da Granxa ten preparado un programa para a Romaría do Pico Sacro con misas e música, acompañadas de polbo, churrasco e doces



## O ACUD Camporrapado logra o ascenso á Segunda Rexional

Despois de varios anos de intenso traballo, o ACUD Camporrapado recolle os froitos en forma de título de Liga da Terceira Rexional Galega e ascenso a Segunda Rexional. Unha meritoria vitoria no campo do Forte diante da UD Santiso, que estaba a ser o mellor equipo da segunda volta, certificou un título máis que merecido despois do gran xogo amosado polo equipo boqueixonés ao longo de toda esta temporada.



## Dúas judokas do Skola Lestedo no Campionato de España de Judo

Irene Ferreiro, veciña de Sucira, e Andrea Álvarez, veciña de Vedra, foron convocadas pola selección galega de Judo para tomaren parte no Campionato de España Infantil e Cadete de Judo, disputado o 27 e 28 de abril no Navarra Arena de Pamplona. As deportista que adestran no centro deportivo Skola Lestedo realizaron unha gran competición. De feito, Irene Ferreiro mesmo conseguiu un máis que meritorio sétimo posto no campionato nacional.

# Deporte, relatos breves e un cómic sobre Neira Vilas para celebrar as Letras Galegas

O Concello de Boqueixón conmemorará o Día das Letras Galegas cun acto especial que terá lugar o xoves 16 de maio, a partir das 12:00 horas, no CPI Antonio Orza Couto. Neste acto, o alcalde Ovidio Rodeiro Tato presentará a versión en formato banda deseñada do libro "Memorias dun neno labrego", de Xosé Neira Vilas. Unha presentación na que estará acompañado polo presidente da Fundación Neira Vilas, Fernando Redondo Neira, e pola autora/ilustradora da banda deseñada: Iria Aldegunde.

Unha vez presentado o libro, o Concello de Boqueixón fará entrega dos premios do X Certame de Relato Curto Xosé Neira



Vilas, así como exemplares dos textos gañadores editados para a ocasión.

## Camiño das Letras

Por outra banda, o propio mércores 17 de maio terá lugar a décima edición da Carreira Camiño das



Letras, unha proba cultural e deportiva impulsada por Xurdir e que conta coa colaboración do Concello de Boqueixón, que ten por obxectivo celebrar as Letras Galegas e poñer en valor o Camiño de Santiago a través do deporte.

A X Carreira Camiño das Letras constará de dous circuitos nas que poderán participar atletas federados ou sen federar: unha carreira de 15 km, que partirá ás 10:00 horas do Pico Sacro e percorrerá a Vía da Prata ata a Cidade da Cultura; e outra de 5 km, que comezará ás 10,05 horas no Gaiás e seguirá un circuito polo Bosque de Galicia.

As persoas interesadas poderán inscribirse na web [www.carreirasgalegas.com](http://www.carreirasgalegas.com). Habrá servizo de autobuses e gardarroupa desde a Cidade da Cultura ao Pico Sacro e todas as persoas participantes recibirán un libro de agasallo xunto ao dorsal, que deberán recoller en Outeiro do Castiñeiro 73, baixo, Santiago.



## Catro medallas no Campionato Galego de Judo disputado en Lugo

Espectacular participación do Escola Judo Club Boqueixón no Campionato Galego de Judo disputado en Lugo onde catro deportistas locais obtiveron cadansúa medalla. Así, Andrea Álvarez proclamouse campioa galega infantil na categoría de menos de 48 kg e Irene Ferreiro conseguiu o subchampionato infantil de menos de 44 kg. Completaron o medalleiro Lucía Pol Mera e Bruno Rey, con sendos bronces na categoría Infantil de menos de 52 kg e menos de 38 kg.



## O Club Squadra Boqueixón logra tres medallas na Liga Provincial

Grandes resultados para o Club Squadra Boqueixón na I Fase da Liga Provincial A Coruña de Gimnasia Rítmica, disputada en Santiago. As rapazas do conxunto prebenxamín lograron o subchampionato, mentres as alevíns e infantís lograron uns meritorios noveno e sexto posto. Na categoría prebenxamín individual, ouro para Gabriela Places Toubes e bronce para Irene Lareo Serramito. Na categoría promoción, Nerea Barreiro logrou a 12ª praza.



O pavillón do Forte acollerá o 5 de maio a sétima edición do Campionato de Judo

O Concello e a Escola Judo Club organizan o VII Trofeo Primavera Kumi Kata, que terá lugar o domingo 5 de maio no pavillón do Forte. Unha edición que agarda superar os 200 participantes procedentes de clubs da contorna. As competicións darán comezo ás 10:00 horas, coa categorías Alevín e Benxamín A; e continuarán ás 12:00, coas Benxamín B e Prebenxamín



## Maiores de Boqueixón aprenden a usar a novas tecnoloxías na súa vida diaria

Un total de 17 veciños e veciñas de Boqueixón participan no curso gratuito “*Uso das novas tecnoloxías na vida diaria*”, organizado polo Concello de Boqueixón en colaboración coa Fundación Amigos de Galicia. Un curso que foi inaugurado polo concelleiro de Facenda e Servizos Xerais, José Manuel Iglesias Gómez, e a concelleira de Servizos Sociais e Igualdade, Ángela Conde Leis, quen destacaron que se trata dunha

actividade “para promover o envellecemento activo mediante a unha actividade que facilita a socialización e dixitalización dos nosos maiores”.

Nestas sesións, os maiores de Boqueixón están aprende a manexar os seus teléfonos móbiles para realizar xestións a través de Internet como solicitar unha cita médica a través da APP móbil do Sergas, pedir quenda no Concello ou Centro de saúde, sacar di-

ñeiro no caixeiro, actualizar a súa cartilla ou manexar os seus teléfonos móbiles. Uns obradoiros prácticos e sinxelos que teñen como obxectivo favorecer a independencia dixital das persoas maiores de Boqueixón, para que así poidan levar a cabo as súas tarefas diarias de maneira autónoma.

A biblioteca municipal de Boqueixón acolle as clases en horario de mañá. As derradeiras sesións terán lugar os mércores 8 e 15 de maio.

### AXENDA DO MES DE MAIO

Sábado  
4

#### XXXI Encontro de Maiores

Polideportivo do Forte. 13:30 h.  
Colabora SBC Gasolineras.

Domingo  
5

#### VII Trofeo Primavera Kumi Kata

Pavillón O Forte.  
10:00 h. Alevín/Benxamín A.  
12:30 h. Benxamín B/Prebenxamín.

Xoves  
9

#### Exposición de fotografías: Auga, o sangue da terra

Casa do Concelo ata o 3 de xuño.  
AFundación Abanca

Sábado  
11

#### Boqueixón en Ruta: Viaxe a Ribadavia

Prezo: 25 euros. Inscripcións no Concello ou no 981 513 115.

Luns  
13

#### Saída ao Balneario

Saída Praza do Concello, 10:30.  
Prezo: 23 € (circuíto+bus).  
Inscripción: 981 513 106.

Xoves  
14

#### Festival das Letras

CPI Antonio Orza Couto, 12:00 h.  
Presentación de “Memoria dun neno labrego” de Neira Vilas en banda deseñada. Entrega dos premios do X Certame de Relato Curto Xosé Neira Vilas. .

Venres  
17

#### X Carreira Camiño das Letras

Pico Sacro, 10:00 h.  
[www.carreirasgalegas.com](http://www.carreirasgalegas.com).

Domingo  
19

#### XLVII Desfile de Carrozas de San Cidre

Oural-Camporrapado.  
Dende as 11:00 h. Pregón de Fran Cañotas (14:00 h).

Domingo  
26

#### Romaría do Pico Sacro

Roteiro arqueolóxico de balde, ás 12:30 horas.  
Inscripcións: 981 513 061 ou [boqueixonturismo@gmail.com](mailto:boqueixonturismo@gmail.com)

Máis información e inscricións: Centraliña: 981 513 061  
concello@boqueixon.com CIM: 981 513 061  
cim@boqueixon.com Cultura: 981 513 115  
cultura@boqueixon.com Dto. Local e Turismo: 981 513 061  
boqueixonturismo@gmail.com